

小

腆

紀

傳

小腆紀傳卷第二

前翰林院檢討加詹事府贊善銜六合徐鼎謨

紀第二

宏光下

順治元年冬十月乙卯朔我

大清世祖章皇帝定鼎燕京是日明鑄宏光通寶錢以總兵
官鄭芝龍鎮守福建羅聯芳鎮守貴州丁巳錢謙益疏薦蔡
奕琛頌馬士英功兼雪逆案阮大鍼楊維垣賈繼春吳孔嘉
房壯麗呂純如等冤己未以降賊臣張縉彥總督北直山西
河南河北軍務黃國琦爲監軍施鳳儀行鹽揚州給事中李
維樾胡時亨各疏糾之不聽大學士高宏圖罷甲子鳳陽地

震丙寅再震誠意伯劉孔昭弑其祖母胡氏遣太監孫元德
往浙閩督催錢糧加湖廣巡撫何騰蛟兵部右侍郎巡撫全
省癸酉命丁魁楚以原官總督兩廣軍務復景帝母吳氏爲
皇太后諡曰孝翼溫惠淑慎慈仁匡天錫聖皇太后復惠宗
弟允熈吳王諡悼允熹衡王諡愍允熙徐王改諡哀長子文
奎曰恭愍皇太子少子文圭追封原王諡懷公主駙馬復舊
號命左春坊衛胤文以原官兼兵科給事中監高傑軍甲戌
內批以張捷爲吏部尙書蔡奕琛爲吏部右侍郎楊維垣爲
通政使乙亥以張秉貞爲都察院右僉都御史巡撫浙江丙
子命以來年正月台祀天地於南郊馬士英請戶部給直省
印單凡贖鍰自杖以上解部充餉從之丁丑命王永吉暫駐

河上料理戰守以解學龍爲刑部尙書阮大鍼疏糾雷縝祚
命嚴訊戊寅加左良玉太子太傅壬午停今年決囚子秦楚
殉難諸臣祭葬有差定江北督撫四鎮額兵三萬楚撫額兵
一萬京營額兵一萬五千癸未太白晝見以劉安行爲都察
院右僉都御史提督南直浙江沿海諸稅劉若金爲都察院
右僉都御史提督閩廣沿海諸稅俱兼理海防是月漳州賊
犯汀州把總林深鄭雄戰死尋破雲霄官軍討之走大埔十
一月戊子西宮成賜名慈禧殿桂王常瀛薨己丑鳳陽皇陵
災松柏皆燼庚寅開屯海中玉環諸山命前唐王聿鍵居平
樂辛卯始令生員納銀入貢下登萊總兵邱磊於淮安獄殺
之劉澤清請寄流寓諸生於淮安府學從之癸巳左良玉奏

華容石首之捷命魯王以海居台州甲午我

大清兵取海州乙未端門外火是日我

大清兵攻邳州丙申史可法遣兵復宿遷進援邳州琉球世子尙賢入貢丁酉蘇淞巡撫祁彪佳罷己亥劉澤清請分汛防河自安東至徐州屬王燮田仰王永吉蕭瑒屬督輔開歸屬越其杰從之庚子獻賊僭稱帝於成都連陷旁郡縣事詳忠義列傳以李永茂爲都察院右僉都御史巡撫南贛丁未以張鳳翔爲兵部尙書兼都察院右副都御史巡撫蘇淞盧若騰爲都察院右僉都御史督理江北屯田巡撫廬鳳太監高起潛提督江北兵馬糧餉是日淮安地震己酉九江總兵黃斌卿偵知左良玉難制請改駐皖池從之山西道御史沈

宸荃劾張縉彥王永吉何謙邱祖德黃希憲魯化龍輕棄封疆罪命逮謙等宥縉彥永吉勿問庚戌命許定國鎮守開封河雒始榷酒稅辛亥高傑疏薦吳牲鄭三俊金光辰姜採熊開元金聲等報聞監下江軍職方司郎中楊文聰請於金山圖山築城從之劉澤清薦降賊臣時敏開屯海上蘇京駐廟灣防海從之自五月至於是月不雨河流竭太湖可涉人百年來所未有也時邊警日逼上深居禁中惟漁幼女縱酒演劇工役不已宴資不貲佃練湖放洋舶鹽場蘆洲之課搜括殆盡內則張執中田成外則阮大鍼楊維垣比周固寵政以賄成癸丑上不豫幾殆輔臣入候起居與羣閹竊竊私語外庭莫敢詰或榜門笑罵羣小亦莫之恠也十二月乙卯朔我

大清兵下河南許定國李際遇已潛約降而舉朝莫之知也
命荊王■居九江府加兵部侍郎練國事尙書仍蒞侍郎
事丁巳進劉孔昭劉澤清皆爲侯孔昭辭許之禁巡按御史
訪拏辛酉命何騰蛟以原官總督川湖雲貴廣西等處專理
恢勦召楊鶚回部我

大清兵圍邳州凡三日癸亥定勇衛營額萬五千人甲子敕
程世昌兼督上江糧務丙寅改諡孝宗皇后張氏曰孝成靖
肅莊慈哲懿扶天贊聖敬皇后我

大清兵入河南府總兵李際遇降戊辰以高斗樞爲都察院
右僉都御史巡撫湖廣己巳行稅契法楊維垣追論三朝黨
局上曰宵人躁競不難矯誣君父以逞其私王之桀等已經

大赦姑不究三朝要典民間尙有存者禮部訪求送史館以存列聖忠孝之實被罪諸臣吏部察明分別復職於是已死之劉廷元等二十人予謚蔭祭葬未死之王紹徽等十三人原官起用尋逆案編修吳孔嘉言要典宜列當日奏議以存實刪去附和命下所司刪定我

大清留使臣左懋第馬紹愉縱陳洪範南歸和議不成有顛僧大悲至京自稱齊王又稱潞王下鎮撫司勘訊壬申加馬士英少師禁各官薦舉命王永吉專防江北張縉彥專防河南縉彥定諸將汎地王之綱自永城至甯陵許定國自甯陵至蘭陽劉洪起自祥符至汜水癸酉復降賊臣左春坊韓四維原官給事中戴英劾之命改別衙門甲戌命史可法會兵

援邳州乙亥追封于謙爲臨安伯遣官致祭丁丑開文武職
官誥命事例戊寅我

大清兵自孟津縣渡河張縉彥等走沈邱命高傑進屯歸德
以備之敘鄖陽固守功加陞巡撫前按察使高斗樞都察院
右副都御史辛巳罷南郊改於明年冬至御史沈宸荃疏諫
不聽壬午以瞿式耜爲都察院右僉都御史巡撫廣西馬體
乾爲都察院右僉都御史巡撫四川癸未馬士英請權酷從
之左良玉奏復公安豐沛賊程繼孔迎高傑於河傑斬以徇
論功加太子少傅以賈登聯爲四川總兵官是日布衣何光
顯上書乞誅馬士英劉孔昭詔戮光顯於市甲申上御興甯
宮我

大清順治二年乙酉春正月乙酉朔日有食之是日大雪上在南京稱宏光元年免朝賀庚寅以新殿推恩加史可法太師兼太子太師建極殿大學士馬士英少師兼太子太師中極殿大學士王鐸少保兼太子太保武英殿大學士于蔭以士英掌文淵閣印充首輔辦事可法辭太師許之壬辰立春流星入紫微垣癸巳大雷電雨雹命黃得功劉良佐進屯潁毫皆受命不行高傑提兵直抵關雒進據虎牢乙未解學龍再上從逆諸臣罪案兼請停刑許之是日許定國誘殺興平伯高傑於睢州丙申傑部將攻睢州定國遂叛降於我大清戊戌禁宗室入京朝見壬寅命在京諸臣自陳癸卯以吏部左侍郎蔡奕琛兼東閣大學士入閣辦事甲辰命刪定

三朝要典乙巳朱國弼張孫振劾解學龍黨從逆奪學龍職
召前都察院左都御史唐世濟以原官管右都御史事庚戌
命武臣自公侯伯以下非賜肩輿並騎馬坐蟒斗牛非奉賜
麒麟白澤非勳爵不許借用辛亥加監軍侍講衛胤文兵部
右侍郎總督高傑標下鎮將兵馬經略開歸兵部尙書張國
維乞歸省許之是月我

大清兵取西安李自成走襄陽二月乙卯命清釐濫冒勳衛
丙辰以王驥爲都察院右副都御史巡撫湖廣戊午以高倬
爲刑部尙書以阮大鍼爲兵部尙書兼都察院左副都御史
協理部事仍巡視江防命太監李國輔開採雲霧山給事中
吳适疏諫不聽尋報罷巡按浙江御史彭遇颺爲民所逐命

改調淮揚加鹽課引五分甲子諡思宗皇太子曰獻愍定王
曰哀永王曰悼乙丑遣黃道周祭告禹陵史可法請用高傑
部將李本身爲提督不許黃得功引兵趨揚州遣盧九德宣
諭解之曰大臣當先國事而後私讎黃得功若向揚州使高
營將士棄汎而東敵人躡之南下誰執其咎朕於諸藩恩禮
有加諸藩亦當恪守臣節勿輕舉以誤國家得功不得已引
還裁九江額餉六萬總督袁繼咸爭之不聽請罷亦弗許丙
寅命於蘇州織造大婚冠服張孫振奏劾禮部尙書顧錫疇
並論奪溫體仁諡事丁卯錫疇罷蔭方孝孺裔孫五經博士
前山西殉難巡撫蔡懋德子方燾疏請卹典不許贈伏法太
監劉元斌王裕民祭葬予逆案徐大化徐景濂劉廷元等卹

典癸酉撤高傑兵回命劉良佐防歸德遣太監高起潛安撫
傑營將士駐揚州時武臣借口助餉往往破人產延陵朱一
馮者已革巡撫也富而吝里人訴之上以一馮身爲大臣多
藏厚亡大喪縉紳之體命察其田產又諭部臣曰捐助原聽
民樂輸抄沒乃朝廷偶行豈刁民獻媚之事宗藩勦戚須敬
禮士大夫與地方相安不得非法罔利癸酉欽天監奏日月
色甚赤上曰是何分野何無占候其訪術者舉用甲戌進蔡
奕琛禮部尙書兼文淵閣大學士乙亥追封弟由桀顯王諡
曰冲丙子改上思宗廟號曰毅宗封慈煥崇王贈死事武臣
沈壽崇知府王行儉知縣李允在等官蔭丁丑止滇黔援兵
御史袁宏勳疏攻袁繼咸左良玉救之併言要典宜焚上諭

曰此朕家事列聖父子兄弟之間數十年無纖毫間言諸臣
妄興誣構卿一細閱亦當倍增悲憤但與見在廷臣無關悉
從寬宥不必疑猜戊寅李自成走承天己卯鐫各衙門印去
南京字是月闖賊復犯鄖陽守將王光恩禦卻之三月乙酉
僧大悲伏誅丁亥命王永吉帶撫淮安衛庠文兼撫徐揚復
溫體仁諡蔭召勳臣朱國弼等閣臣馬士英等翰林劉正宗
等入見武英殿面諭同府部九卿科道辨驗北來太子真偽
日午羣臣奏係故駙馬都尉王昺姪孫王之明曾侍衛東宮
家破南奔鴻臚少卿高夢箕家丁穆虎教之詐稱太子乃下
中城兵馬司獄卽擢楊維垣爲都察院左副都御史戊子以
太監喬上總理兩淮鹽課己丑我

大清兵取郾城又取西平闕賊逼承天左良玉遣使告急命督臣何騰蛟禦之辛卯我

大清兵取上蔡壬辰以耿廷鐸爲都察院右僉都御史巡撫四川命百官會審北來太子於午門外闕賊寇潛江河南有婦人童氏自稱王邸元妃巡按御史陳潛夫具儀從送至京上怒下童氏錦衣衛獄並逮潛夫癸巳遙祭諸陵乙未阮大鍼薦馬士英之子錫爲京營總兵官戊戌命黃斌卿以原官掛征蠻將軍印鎮守廣西方國安掛鎮南將軍印充總兵官駐防池口己亥徙崇王慈爚居福州上懿安皇后諡曰孝哀慈靖恭惠溫貞偕天協聖哲皇后更恭皇帝諡曰孝皇帝命黃得功移鎮廬州與劉良佐合力防禦壬寅思宗忌日上於

宮中舉哀百官於太平門外設壇遙祭以東宮二王祔癸卯
命三法司覆審北來太子等黃得功劉良佐左良玉何騰蛟
袁繼咸各疏論北來太子事良佐疏兼及童氏事言上爲羣
臣所欺將使天倫絕滅上曰朕元妃黃氏先朝冊封不幸夭
逝繼妃李氏又已殉難登極之初卽追封后號詔示海內卿
爲大臣豈不聞知童氏不知何處妖婦詐冒朕妃朕初爲郡
王有何東西二妃據供是邵陵王宮人尙未悉眞僞王之明
是駙馬王昺之姪孫避難南來高夢箕家丁穆虎教令冒認
東宮正在嚴究若果眞實朕於夫妻伯姪之間豈無天性况
宮媵相從患難者頗多朕於先帝無纖芥之嫌因宗社無主
不得已從羣臣之請勉承重寄豈有利天下之心忍加毒害

於其血脈至於舉朝文武誰非先帝舊臣誰不如卿肯昧心
至此朕夫妻之情又豈羣臣所能欺蔽但太祖之天潢先帝
之遺體不可以異姓頑童瀆亂宗祏宮闈風化所關豈容妖
婦闖入國有大綱法有常刑卿不得妄聽妖訛猥生疑議因
命法司將二案審明情節傳示中外以釋羣疑時流言益甚
吏可法疏請召對以息羣譟上諭止之封外戚黃九鼎爲雒
中伯加朱大典兵部尙書兼右副都御史巡撫應天乙巳我
大清兵取歸德巡按御史凌駟及其從子潤生死之丁未許
罪廢諸臣輸銀復官戊申左良玉舉兵反焚武昌東下己酉
以錢繼登爲都察院右僉都御史總理兩淮鹽法兼督江防
罷巡鹽御史壬子我

大清兵取潁州復取太和縣王永吉請飭史可法衛膺文共保徐州士英不聽加李本身太子太保左都督遣使冊封琉球國王是月川省督師王應熊總督樊一蘅攝巡撫馬乾參政劉鱣長副將曾英朱化龍同知屠天顏宗室進士朱奉鈞舉人鄭延爵武進士楊展土司楊之明馬京馬亨各起兵討獻賊收復州縣獻賊乃大殺四川紳士及其偽官夏四月癸丑朔御史畢士臣奏孟夏時享太廟陪祀官多不至者以左兵東下命史可法督諸軍渡江入援丙辰左良玉兵陷九江尋死其子夢庚自稱留後命阮大鍼劉孔昭帥師禦之左夢庚兵陷建德戊午陷彭澤己未陷東流命阮大鍼會同黃得功堵勦庚申光時亨周鍾武懷伏誅同日賜周鍾舊緡祚自

盡辛酉黃得功駐兵荻港是日我

大清兵自歸德分道南下總兵李成棟潛遂入徐州壬戌封
常澄爲襄王居汀州黃斌卿敗左兵於銅陵乙丑左夢庚兵
陷安慶是日我

大清兵取泗州丙寅渡淮史可法退保揚州連章告急言上
游不過欲除君側之奸未敢與君父爲難北兵一至則宗社
可虞大理寺卿姚思孝工科吳希哲請備淮揚上諭士英曰
良玉雖不應與兵然看他本上原不曾反淮揚急則赴
士英釋指諸臣曰此皆良玉死黨爲游說我君臣甯
皆不丁死良玉手上無如何也時高營潰兵掠舟渡江
不認爲遠礮擊之潰兵進退無所遂降於我

大清丁卯選淑女於元暉殿京師女七十人中阮姓一人浙
女五十人中王姓一人戊辰命潞王常芳移駐湖州周王恭
楊魯王以海移駐江西廣東己巳以劉洪起爲提督汝甯開
封等處總兵官時河南盡失洪起獨支持光黃間庚午命王
永吉總督防河錢繼登兼撫揚州左夢庚兵至池州壬申詔
梟左良玉罪狀總兵鄭鴻達奏破高傑營亂兵於江中我
大清兵圍揚州劉澤清假入拔大掠而東丙子以霍達爲都
察院右僉都御史巡撫蘇松丁丑我

大清兵克揚州督師兵部尙書大學士史可法揚州知府任
民育等死之甘肅團練總兵官劉肇基及原任兵部右侍郎
張伯鯨等俱遇害總督兵部侍郎衛胤文監紀主事何剛先

後赴水死詳忠義傳戊寅召封羣臣王鐸猶請經筵講期五月壬午朔以李彬爲都察院右僉都御史巡撫河南癸未移惠王常潤於嘉興黃得功擊左夢庚於坂子磯敗之丙戌進封黃得功靖國公世襲丁亥封鄭鴻達爲靖鹵伯以楊文驄爲都察院右僉都御史巡撫常鎮時士英與韓贊周盧九德議各門下閤辰開午閉戊子集清議堂議事預坐者十六人馬士英王鐸蔡奕琛陳于鼎張捷陳盟張有譽錢謙益李喬李沾唐世濟楊維垣秦鏐張孫振錢增趙之龍各竊竊偶語百官皆不得與是日豔晦大風雨人心洶洶我

大清兵取瓜州門欄卓椅結大筏燃燈燭施號礮亂流而下南岸以爲北騎渡江也礮石擊之日奏捷轅門鼓角震天京

口民牛酒犒勞歡舞騰發已丑夜大霧我

大清兵從坎壘橋狹流輕舟飛渡庚寅黎明升高阜設亭幃擊鼓吹螺我

大清兵開閘放舟蔽江而南諸軍始覺倉皇列陣甘露寺鐵騎衝之悉潰文聰走蘇州鴻逵與鄭彩等入海我

大清兵遂取鎮江辛卯都中各城閉門上集內官問計韓贊周曰兵力單弱守和無一可者不若親征濟則可以保社稷不濟亦可以全身上不聽集梨園子弟雜坐酣飲漏二鼓內官數十人跨馬出通濟門贊周從之文武百官無知者宮娥女優雜沓西華門外昧爽劉孔昭斬關走太平壬辰馬士英挾太后出奔杭州兵民擁立北來太子於武英殿殿王鐸幾

死癸巳上至太平劉孔昭不納走蕪湖總兵黃斌卿已遁上
匿黃得功麾下總兵翁之琪舟中往就得功營倉卒無璽以
幅紙書官銜姓名命阮大鍼朱大典兼東閣大學士督師以
揚州府同知李繼晟爲右僉都御史巡撫安慶是日總督京
營忻城伯趙之龍具表迎降丙申我

大清兵營於城北大學士蔡奕琛王鐸禮部尙書錢謙益暨
勳戚文武皆降大臣殉難者刑部尙書高倬自縊死工部尙
書何應瑞自縊不死復自刎爲其子所持終事不可考吏部
尙書張捷微行至雞鳴寺以佛幡自縊死或曰捷聞百姓毆
王鐸懼禍及自裁也左副都御史楊維垣偕其妾朱氏孔氏
自縊死或曰維垣蹙二妾死置三棺中題楊某之柩而竅其

下夜遁至秣陵關爲怨家所殺禮部主事黃端伯戶部郎中
劉成治主事吳嘉胤中書舍人龔廷祥欽天監博士陳于階
監生吳可箕等皆死之上將幸杭州命朱大典方國安以部
兵先發得功斷後未發而叛將劉良佐引追兵至得功自刎
死良佐麾軍劫其營將士倉卒謀渡而浮橋鎖忽斷中軍翁
之琪投江死左協總兵田雄入上舟負上與右協總兵馬得
功出降丙午良佐挾上至南京以無幔小轎入城首蒙帕衣
藍布衣油扇掩面百姓夾路唾罵投瓦礫乘馬至內守備府
見我豫王叩頭豫王宴之靈璧侯府坐北來太子下趙之龍
暨禮部八人與宴豫王問北來太子事上不答豫王又曰我
兵尙在揚州汝何便走自主之邪抑人教之邪汗流浹背俯

首無言終席拘於江甯縣九月甲寅北去隆武帝立遙上尊號曰聖安皇帝明年五月殂於北京永厯帝上諡曰安宗簡皇帝

男承禮編輯

仁和魏錫曾參校
會稽梁繼元覆校

小腆紀傳卷第二終

小腆紀傳卷第三

前翰林院檢討加詹事府贊善銜六合徐鼐撰

紀第三

隆武 附紹武

隆武帝太祖九世孫也諱聿鍵小字長壽其先唐定王桎太祖第二十三子封南陽父器壻唐世子母毛氏祖端王碩愼戚於嬖妾欲立其愛子囚世子於承奉司王時年十二歲亦從之讀書識大義處患難而意氣不挫年二十有八尙未請名世子爲其弟毒死端王諱之分守道陳奇瑜知府王之桂謂之曰世子薨逝不明又不立其子事且露端王懼請名立爲世孫崇禎五年壬申端王薨王嗣位年三十一矣選妃曾

氏諸生曾文彥女七年甲戌流寇入河南南陽當其衝城庫薄王捐千金修築知府陳俊豪弗授工王以爲言詔逮俊豪下獄已又援潞王例乞增兵三千人以陳永福爲參將領之不許八年冬賊再犯南陽上疏言臣府護衛一千二百人近制以其半爲汴梁班軍給撫臣策使惟明詔念郡城單弱臣困扼以全軍見還思宗報之曰南陽番軍班直祖制已久朕不敢變時海內多故思宗思廣羅賢俊召見宗人遴才擢官以通宗祿之窮發金匱書得高皇帝制曰宗室子孫入爲中朝官者得以其階換於是下詔援祖訓郡王子孫文武堪用者考驗授職禮部右侍郎陳子壯執不可王厯引前代故事詆之援據經傳皆有本王好尊宗藩體統總督盧象昇過南

陽不朝劾奏之又所建請多與廷臣相牴牾思宗亦不之善也九年秋八月京師戒嚴王率護軍勤王又殺其兩叔汝南道周以興止之不聽至裕州巡按御史楊繩武以聞下旨切責會前鋒值寇亡其內豎二人乃返國十一月下部議給事中馮可賓鍾珩議廢爲庶人安置鳳陽高牆押發官同知張有度欲以檻車行王自裁不殊至鳳陽陵奄索賄不得用祖制墩鎖法以困苦之王病幾殆曾妃割股以進始愈有司廩祿不時資用乏絕時有望氣者以高牆中有天子氣言於淮撫路振飛振飛假賑罪宗入牆見王心異之因言吏虐狀振飛疏請加恩罪宗置吏無狀者石應詔於法會南都立大赦出高牆禮部請復故爵不許命徙居廣西之平樂府乙酉五

月行抵杭州而南都已覆王勸谿王監國不聽時鎮江總兵鄭鴻達鄭彩自京口戶部郎中蘇觀生自南都胥會於杭達彩與王語及國難沾泣襟袂二人奇之令副將江美鼈鄭升衛入關既聞杭州降二人全師回閩與巡撫張肯堂等議奉王監國六月甲戌次浦城閏六月癸未各官迎謁於水口驛南安伯鄭芝龍禮部尙書黃道周及肯堂三上箋勸進王出御用銀百五十兩葺行宮令勿擾民丁亥監國福州建行在太廟社稷諭曰孤聞漢室再墜大統猶繫人心唐宗三失長安不改舊物豈獨其風俗醅固不忘累世之澤哉亦其忠義感憤豪傑相激使之然也孤少遭多難勉事詩書長痛妖氛遂親戎旅亦以我太祖驅除羣雄功在百姓而勅敵驚然睥

睨神器爲子孫者誠不忍守文自命坐視其陵遲也二十年來往寇薦驚孤未嘗兼味而食重席而處北方二載兩京繼陷天下藩服委身奔竄孤中夜臥起垂涕縱橫誠得少康一旅之師周平晉鄭之助躬率天下以授彤弓豈板蕩哉今幸南安芝龍定鹵鴻達二大將軍志切恢復共賦無衣一二文臣以春陵瑯琊之義過相推戴登壇讀誓感動路人嗚呼昔光武昭烈皆起布衣所遭絕續與大敵爲讎而能正言舉義躬承舊業况今神器乍傾天命未改孤以藩服感憤間關逢諸豪傑應卽投袂知明赫之際神人叶謨上天所眷顧我太祖紹其子孫猶未艾也書曰與治同道罔不興傳曰多助之至天下順之得道者多助自閏六月初二日監國伊始一切

民間利病許賢達條陳孤將悉與維新總其道揆副海內喁
喁之意焉鴻達欲早正位以繫人心諸大臣言監國名正出
關尺寸建號未遲侍郎李長倩有急出關緩正位示監國以
無富天下之心疏芝龍亦固爭以爲不可惟鴻達曰不正位
無以厭眾心以杜後起遂定議丁未祭告天地祖宗卽皇帝
位於南郊以福建爲福京福州爲天興府布政司爲行殿大
赦改元隆武追尊皇考爲皇帝妣爲皇后遙上宏光帝尊號
曰聖安皇帝詔曰朕以天步多艱遭家未造憂勞監國又閱
月於茲矣天下勤王之師旣已漸集向義之心亦以漸起匡
復之謀漸有次第朕方親從行間鼓舞率勵以觀厥成而文
武臣僚咸稱萃渙之義貴於立君寵綏之方本乎天作時哉

不可失天命靡不勝朕自缺然未有不續以仰對上帝克慰祖宗而臨安息轡導讓無期大小汎汎如河中之水朕敢不黽勉以慰眾志而副羣望朕稽載籍漢光武聞子嬰之信以六月卽位鄴南卽以是年爲建武元年昭烈聞山陽之信以四月卽位漢中卽以是年爲章武元年艱危之中豈利大寶亦惟是興義執言繫我臣庶之故也以今揆古卽以是年爲隆武元年其承天翊運定難功臣悉以次第進爵分茅胙土其翊運宣猷守正文臣亦以次第進級孝秀耆宿軍民人等俱依前諭優給所在山川鬼神除淫祠外皆遣官祭告以示朕續緒爲天下請命之意焉進芝龍鴻達爵爲侯封鄭芝豹澄濟伯鄭彩永勝伯賜號奉天翊運中興宣力定難守正功

臣以黃道周爲吏部尙書武英殿大學士蘇觀生爲吏部右侍郎兼東閣大學士張肯堂爲兵部尙書何楷爲戶部尙書周應期爲刑部尙書鄭瑄爲工部尙書曹學佺爲禮部尙書兼蘭臺館學士召舊輔何吾驕蔣德璟黃景昉姜曰廣吳牲高宏圖起朱繼祚林欲楫路振飛曾櫻熊開元黃鳴俊林增志李先春陳洪謐等入閣上少遭患難慨然以復讐雪恥爲務布衣蔬食不御酒肉敕司禮監行宮不得以金玉玩好陳設器用瓷錫帷幄衾褥皆布帛後宮無嬪御執事三十人而已芝龍進美女十人留之而絕不御中宮懿旨選女廚十人上以爲擾民不許素好讀書博通典故手撰三詔與魯監國書羣臣皆莫能及感振飛舊恩募能致者賞千金給五品秩

振飛至拜太子太保吏兵二部尙書文淵閣大學士官其子
太平爲兵部員外郎開儲賢館定十二科取士以觀生領之
受鄭芝龍子鄭森才賜國姓改名成功命提督禁旅以駙馬
都尉體統行事卽延平王也是時宗室諸王流竄南方臣民
奉之建義者浙東張國維朱大典孫嘉績等奉魯王以海監
國於紹興秋七月江西布政使夏萬亨分巡道王養正奉益
王由本起兵建昌不克萬亨等皆死之巡撫田仰監軍道荆
本澈總兵張士儀奉義陽王朝墀駐崇明沙刑部郎中王期
昇長興縣民金有鑑奉通城王盛激起兵復湖州中書舍人
盧象觀奉宗室盛瀝起兵攻南京事敗皆亡入太湖與吳易
等相應他則江西吏部主事曾亨應揭重熙起兵撫州左庶

子楊廷麟左中允劉同升起兵贛州通政使劉士楨起兵信
豐前汜水縣知縣胡定海起兵德興瀘溪知縣張載述諸生
魏一柱又德化諸生李含初德安郭賢操各起兵拒守定海
含初尋敗死所謂江右義師也道遠或不能達行在惟贛州
事聞上手詔嘉獎擢廷麟吏部右侍郎同升國子監祭酒時
江以南義師亦林立太湖則職方主事吳易舉人孫兆奎爲
倡諸生陸世鏞沈自炳沈自駟等應之江陰則典史閻應元
陳明遇爲主貢生黃毓祺生員徐趨應之松江則前兵部侍
郎沈猶龍給事中陳子龍中書李待問前羅源知縣章簡起
兵與水師吳志葵黃蜚相應崑山則舉人周室瑜貢生朱集
璜陳大任殺投降之縣丞閻茂才奉總兵王佐才拒守前邑

令楊永言與諸生吳其沆陶城歸莊顧炎武起兵應之嘉定
則進士黃醵耀舉人張錫眉教諭龔用圓諸生馬元調夏雲
蛟唐全昌奉前左通政侯峒曾拒守休甯則御史金聲諸生
江天一爲倡推官溫璜轉餉應之而前山東巡撫邱祖德與
舉人錢龍文生員麻三衡沈壽堯起兵攻甯國前職方郎中
尹民興與生員趙初浣吳漢超起兵守涇縣貴池副榜吳應
箕起兵復建德東流與聲天一相援應浙西則翰林屠象美
郎中錢棟生員鄭宗彝起兵嘉興參將方元章副將姚志倬
張起芬起兵復餘杭其舉義大都與上監國相前後道遠或
聞或不聞皆遙授總督義師銜或敕使將命是月崑山陷佐
才室瑜集璜大任其沆城死之攻甯國不克壽堯死之嘉興

陷前吏部尙書徐石麒暨象美棟宗彝死之餘杭敗元章死之嘉定陷峒曾醅耀以下皆死之華陽山寨陷祖德死之稽亭山寨陷三衡及諸生吳太平等七家皆死之又前青陽知縣麗昌庠太倉生員王湛無錫生員顧杲等甫謀起兵而已敗死或事聞褒卹或不及聞者具詳列傳又川省千總周鼎昌義民余飛等亦起兵拒獻賊賊怒大殺成都所屬人邛蒲數百里蕩爲血肉場詳蜀難忠義傳鄭芝龍集廷臣議戰守事宜仙霞關外宜守者百七十處應設守兵若干其戰兵以今冬簡練明春出關一出浙東一出江右計兵二十餘萬餉不支其半乃請於兩稅正供預借一年令羣臣捐俸勸紳士輸助察府縣厯年積穀銀兩未解者悉催赴行在官吏督征

閭里騷然芝龍請清理寺田可得餉八十萬上不許戶部侍郎李長倩請廣開事例從之於是廝養隸卒皆得給劄授官猶苦餉不足廷臣日請出關芝龍殊不欲行黃道周自請以師相募兵江西連楊廷麟何騰蛟爲進取計遂於是月辛未率門人子弟千人以行八月乙酉頒祖訓於廷臣庚寅命肅鹵伯黃斌卿鎮舟山壬辰冊妃曾氏爲皇后封后父曾文彥爲吉水伯癸巳郊祀上帝於南郊鄭芝龍鄭鴻逵稱疾不從尙書何楷劾之上嘉楷命掌都察院事行保甲法定錦衣衛軍制設中前後左右五所每百戶爲一威所八威所爲一禁軍時兵事皆掌於鄭氏芝龍知不出關無以弭眾議乃請以鴻逵出浙東彩出江西各擁兵數千號數萬旣出關託候餉

不行鴻遠駐仙陽鎮惡上書言事者嚴禁仙霞關不聽四方
儒生入彩行百里而還稱餉缺留如故是月靖江王亨嘉僭
號桂林執巡撫瞿式耜幽之兩廣總督丁魁楚遣參將陳邦
傳往討式耜潛與合謀擒亨嘉並其黨檻送福京 我

太清兵克江西之峽江守將鄧武泰死之克袁州同知攝府
事李時興死之克吉安遂取萬安殺巡撫曠昭知縣梁于溪
死之襲臨川曾亨應死之克江南之松江沈猶龍李待問章
簡死之克江陰閻應元陳明遇死之克金山衛指揮侯承祖
死之太湖吳易孫兆奎旣敗浙寇李九成軍敗我師於白龍
橋軍甚盛俄降將吳勝兆合四郡兵至西山盧象觀與中書
葛麟總兵毛重泰陳坦公俱戰死乘勝追易八面環攻易軍

大潰兆奎及沈自炳等死之別部總兵李某生員任源遂吳福之徐安遠全軍覆沒又魏國公徐宏基及幼子文爵避難吳江亦以起義不克死江南義師遂不振惟浙東張國維等能張其軍具詳魯紀傳不具錄九月甲寅我

大清豫親王多鐸以宏光帝北還時闖賊李自成已死其眾無所歸推其兄子李錦爲主同自成妻高氏乞降於督師何騰蛟騰蛟檄道臣堵胤錫往受之一時增兵十餘萬上大喜告廟進騰蛟大學士封定興伯胤錫右副都御史巡撫湖南降將皆授總兵官賜錦名赤心高氏弟一功名必正號其營爲忠貞營已而糧不繼降者稍稍散去高李十三部就食施州衛其餘郝搖旗馬進忠王進才張光翠袁應第牛萬才張

先壁等十餘營悉隸騰蛟麾下召在籍吏部主事夏允彝爲翰林院侍讀兼給事中未受命卒召舉人郭金臺諸生顧炎武爲職方郎中李世熊爲翰林院博士俱辭不至是月江南徽甯事急黃道周疏乞師乞餉爲鄭芝龍所阻涇縣陷趙初浣死之績溪陷金聲江天一死之連陷徽州溫璜死之池州潰吳應箕死之惟吳易出沒太湖吳漢超收邱祖德之遺眾與當塗徐淮聚眾華陽黃毓祺徐趨匿淮上崛強未卽下土加易毓祺兵部尙書總督義師賜敕印繼起者有廣德州太學生吳源長民人裘君量起兵梭子山復州城副將錢國華生員謝琢起兵溧陽遙奉瑞昌王盛懃淮安人王翹林繆鼎吉鼎言等奉新昌王■起兵雲台山復鹽城興化都司鄧

某生員司石磐與相應和我

大清命降臣洪承疇駐南京土國寶駐蘇州相機勦捕諸義師先後崩潰不能有所爲冬十月科臣劉中藻顏詔浙東浙東不納於是閩浙水火矣上以貪吏虐民誅建陽知縣施燦邵武知府吳爝煒推官朱健人稍惴恐原任兵部郎中王期昇御史彭遇颺至行在上加期昇總督遇颺僉都御史大學士路振飛曾櫻封還內降謂遇颺依附馬士英期昇在太湖派餉苛虐歛怨取敗不可用上乃止初汀贛間有峒賊數萬號四營頭左營張安者最強楊廷麟劉同升等招之復撫州又復臨江於是廷麟等請上出江右何騰蛟請出湖南浙中諸將請幸衢州原任臨清知州金堡陛見言騰蛟可恃芝龍

不可恃急宜棄閩幸楚上大喜卽授堡兵科給事中決意出
贛州幸長沙遣大學士蘇觀生先赴南安募兵十一月命修
思宗實錄幸太學下詔親征以唐王聿釗鄧王鼎器監國首
輔何吾騶隨營曾櫻鄭芝龍留守司轉餉吳震文爲隨營兵
部侍郎王觀光爲隨營戶部侍郎鄭鴻逵爲御營左先鋒出
浙江鄭彩爲御營右先鋒出江西先期類於上帝禋於太廟
禱於社稷駕幸西郊行推轂禮爲壇設高皇帝烈皇帝位御
翼善冠詣壇所百官陪位武臣戎服聽事上皮弁升壇拜謁
立於神位西南面御營先鋒北面跪兵部授鉞上東向揖之
賜餞光祿寺授爵御營先鋒跪受爵誠勞畢謝恩出率將士
跪壇下上甲冑誓師乃鳴金鼓揚旌而出當授鉞時風雨晦

冥壇上燭盡滅神位皆仆鴻逵出城馬蹶路地識者知其不祥焉是月陝西都督同知孫守法起兵復鳳翔進攻西安不克十二月甲申上發福京遣錦衣衛康永甯乞師於安南國江西巡撫劉同升卒以總督萬元吉兼巡撫事壬寅督師黃道周敗績於婺源被執我

大清兵克撫州知府高飛聲死之右僉都御史陳泰來起兵復上高新昌甯州萬載進攻撫州敗績死之是月雲南土司沙定洲作亂黔國公沐天波走楚雄連陷旁郡詳滇黔難忠義傳我

大清順治三年丙戌春正月己酉朔上在建甯稱隆武二年以三大罪自責不受朝賀交趾日本國遣使入貢廣東布政

使湯來賀解餉至行在擢戶部右侍郎馬士英自浙東叩關求入朝諭守關將士勿納士英七疏自理不許鄭芝龍方國安合疏薦之命充爲軍前辦事官俟恢復杭州復職浙東魯監國遣柯夏卿曹維才來聘上賜監國手敕曰朕無子王爲皇太姪朕有天下終致於王同心戮力共拜孝陵命取浙東所用職官盡列朝籍不分彼此加夏卿兵部尙書維才光祿寺少卿又命僉都御史陸清源解餉十萬犒浙東江防諸軍方國安兵譁奪餉殺清源自是閩浙釁益深或曰馬士英部將趙體元殺之也何騰蛟會師湘陰忠貞營李赤心遇

大清兵而敗諸鎮兵遂不進授丹徒諸生錢邦芑爲御史大學士熊開元爭之改兵部司務尋復授御史開元遂乞罷以

蘇觀生兼吏兵二部尙書行在文淵閣大學士賜尙方劍便
宜行事上御門賜銀印曰瞻奉南北山陵安集軍民文武官
授方士蔡鼎爲軍師是月癸亥福京大雷電甲子雨雹大如
斗晝晦不相見浙西金有鑑再攻長興敗死沙賊寇楚雄游
擊王承憲敗死金滄副使楊長知悉力禦之分兵陷武定參
將高其勳死之陷大理指揮陳禎死之陷太和縣丞王士傑
教授段兒錦經歷楊明盛前同知蕭時顯舉人高拱極等死
之陷通海典史單國祚死之四川眉州義民陳登嶧起兵破
獻賊於醴泉河二月馬脛嶺兵變命路振飛往浦城安撫丁
亥大雨雹晝晦不相見詔寬逆案之禁上曰北京陷於東林
南京亡於魏黨厥罪惟均其黨附概予洗濯以觀後效廣西

有僧自稱宏光帝貴州撫臣俞思恂以聞詔議迎請廷臣曰
卽真宏光甫經失國有尊奉而無迎請審知其僞下獄誅之
尋有木堅李之秀者自稱原任兩司召對以原官補用發覺
伏誅亨嘉俘至行在下諸王議廢爲庶人以幽死其黨推官
顧奕總兵楊國威等皆伏誅封丁魁楚平粵伯加瞿式耜兵
部侍郎式耜辭不許以晏日曙巡撫廣西鎮國將軍常采起
兵蘄州敗績死之封孫守法武大定爵爲伯三月戊申朔督
師大學士黃道周殉節南京事聞輟朝哭贈文明伯時江楚
迎駕疏相繼至上決意出汀入贛與湖南爲聲援鄭芝龍不
欲上行使軍民數萬人遮道號呼擁駕不得前芝龍因表請
回天興上不得已駐延平以府署爲行宮封朱成功爲忠孝

伯掛招討大將軍印命前大學士傅冠總理湖南勦撫事冠
十二疏乞罷許之左都御史張肯堂疏請北征詔加少保賜
尙方劍便宜行事實無一兵也尋兵科給事中徐孚遠白松
江航海至上水師合戰議請以水師千人由海道與浙東陸
師會於金陵詔進肯堂大學士以太常卿朱永祐吏部郎中
趙玉成兵科給事中徐孚遠蘇州推官周之夔爲參軍以平
海將軍周鶴芝將前軍定洋將軍辛一根將中軍樓船將軍
林習將後軍行有日矣鄭芝龍尼之不克行我

大清兵克奉鄉監軍道許文龍死之辛未克吉安職方主事
郭錕死之萬元吉退保贛州是月四川參將楊展復川南諸
州縣督師王應熊總督樊一蘅乃檄諸路兵討獻賊賊大殺

遺民率眾東下展逆戰於江口大破之賊走還成都夏四月
庚辰萬壽節不受賀命禮臣追復建文年號立忠臣方孝孺
祠鄭彩棄廣信奔入杉關我

大清兵遂克撫州永甯王慈炎死之報至舉朝震驚詔削彩
職戴罪圖功我

大清兵克鉛山兵科給事中胡夢泰兵部員外郎萬文英主
事唐倜死之克新城知縣李翺死之五月丙午朔我

大清兵進逼贛州巡撫劉廣胤戰敗被執楊廷麟萬元吉悉
力固守擢兵科給事中揭重熙爲僉都御史巡撫江西加吏
部尚書郭維經總督湖南北江西廣東浙江福建軍務銜募
兵援贛州擢湖廣監軍道章曠爲右僉都御史巡撫湖北琉

球國入貢廷試貢生取萬荆等十二人爲萃士照庶吉士例
送翰林院教習先是魯監國遣都督陳謙入閩久駐衢州自
云魯已爵爲侯邀封爵上命取侯印爲驗謙齎印至行在御
史錢邦芑請誅之芝龍亟入朝請以官贖不得命由是益萌
異志乙丑天狗星隕是月壬申浙東江上兵潰方國安劫魯
監國走紹興肅鹵侯黃斌卿殺監軍道荆本澈太湖諸生張
飛遠襲金山衛不克六月開科取士命流寓諸生皆入試廣
額七十名以編修劉以修閔肅充主考官舉人葉瓊等百七
十五人有許士以賄進者命覆試落四名逮同考推官王三
俊下獄追賊溫州總兵賀君堯殺前大學士顧錫疇以元子
誕生大赦進諸臣爵錢邦芑疏諫不聽釋僉都御史田開於

獄前南贛巡撫李永茂遣粵兵五千援贛戰於李家山圍暫解粵兵退守南康時贛城堅守已久上諭獎賜名忠誠府加楊文薦右僉都御史偕郭維經出閩援贛與楊廷麟萬元吉爲協守計旣而浙東報至我

大清兵以是月一日渡錢塘江魯監國航海去連陷紹興東陽金華衢州嚴州張國維朱大典等皆死詳魯紀傳鴻逵駐關外聞警徒跣疾行三日抵浦城事聞削鴻逵爵芝龍時已通款於洪承疇託言海寇至撤兵回安海守關將士皆隨去仙霞嶺空無一人惟所遣守關文臣及內官數人偵探報聞而已是月我

大清兵復定陝西孫守法所得州縣復失聲勢寢衰退保五

郎山武大定敗於興安遁入蜀太湖義師潰忠義伯兵部尙書吳易被執至杭州不屈死之江東義師略盡矣七月己巳上御門內侍捧小匣置御前諭羣臣曰朕本無利天下心以勤輔擁戴不得已勉徇羣策浣衣糲食有何人君之樂朝夕乾惕恐負重付豈意諸臣已變初志昨巡閱之使得爾等出關迎降書二百餘封今俱在此朕不欲知其姓名也今命錦衣衛焚之午門爾諸臣有名者尙洗心滌慮倘能竭節奉公不渝終始是所望也上長身豐頤聲如洪鐘聞者悚息於是擇日赴贛州時楚督何騰蛟遣郝永忠將兵奉迎甫抵韶州而我

大清兵已過衢州矣是月獻賊毀成都走川北八月甲午上

知仙霞不可守決意幸贛自延平出奔宮眷皆騎猶載書十餘簾以從從者輔臣何吾騶朱繼祚黃鳴俊數人而已乙未我

大清兵入仙霞關守浦城御史鄭爲虹給事中黃大鵬死之丁酉取延平知府王士和死之我貝勒旣克延平詢知上由汀州趨江右乃親統

大兵取福京而分遣降將李成棟引兵追上是日上發順昌聞追兵已至劍津倉卒就道妃媵有一騎而三人者福清伯周之藩給事中熊緯將兵五百人隨扈庚子抵汀州明日五鼓有數十騎稱扈蹕者突入行宮之藩緯皆鬪死上與曾后遇害於汀州府之大堂或曰遇害於福京后投九龍潭死亦

曰死於建甯或又曰建甯代死者爲唐王聿釗汀州代死者爲張致遠上實未死後朱成功屯兵鼓浪嶼有遣使存問諸臣者云爲僧於五指山然亦莫別眞僞也殉難可紀者自之藩緯外文臣則戶部尙書姜一洪編修徐復儀御史王國翰艾南英郎中賴垓武臣則總兵胡上琛百戶閔時或追扈力竭死或聞難自盡死福京殉難者禮部尙書曹學佺定遠侯鄧文昌中書舍人鄭羽儀其最著者也時廣信亦破巡撫周定仍副使胡奇偉同知胡甲桂死之降臣馬士英阮大鍼方逢年方國安爲我

大清貝勒勒克德渾所誅總督江西義師僉都御史揭重熙翰林院檢討傅鼎銓謀援福京不及重熙次王洞鼎銓次樂

安九月上杭人執職方主事李魯以降於我

大清魯不屈死之前大學士蔣德璟卒於泉州冬十月贛城
聞汀州之訃全城氣索丙子城破楊廷麟萬元吉郭維經楊
文薦等皆死之詳見列傳永厯帝立遙上尊號曰思文皇帝
丁酉春上諡曰紹宗襄皇帝

紹武諱聿鏞隆武帝之第四弟也隆武改元封唐王以主唐
祀丙戌閩敗浮海至廣州鎮將林察迎之時兩廣總督丁魁
楚已奉永厯帝監國肇慶故大學士蘇觀生自南安遣主事
陳邦彥奉表勸進貽魁楚書欲與共推戴事魁楚拒之觀生
乃自南韶旋師廣州有番禺梁朝鍾南海關捷先倡兄終弟
及議觀生遂與舊輔何吾驥侍郎王應華曾道唯布政使顧

元鏡以十一月癸卯朔擁王監國丁未立爲皇帝稱號紹武
以都司署爲行宮封觀生爲建明伯進吾騶等秩旋與應華
等並拜東閣大學士分掌諸部軍國事則觀生掌之按日舉
行幸學大閱郊天祭地諸鉅典一月覃恩數次舉朝無三品
以下官凡宮室服御鹵簿倉卒不辦通國奔走夜中如白晝
至有假冠服於優伶者市人傳以爲笑永厯帝聞王已建號
命給事中彭耀主事陳嘉謨齋詔至廣州諭止復召見陳邦
彥於舟中令齋敕繼至耀嘉謨語不遜王怒殺之邦彥聞之
不敢入遣人以敕授觀生觀生頗不自安而事已不可中止
乃命番禺人陳際泰督師拒桂兵於三水爲桂總督林佳鼎
所敗十二月甲戌佳鼎乘勝至三山口唐總兵林察遣海盜

詐降乘風縱火桂僉事夏四敷赴水死桂總兵李明忠急以所部登岸列營泥淖深三尺人馬盡陷明忠以三十騎走免肇慶大震唐桂方相持未下而降將李成棟率

大清兵已自閩入廣惠潮望風下用兩府印移牒廣州報平安觀生信之不爲備當是時廣州陸寇有花山寨水寇有石徐馬鄭四姓觀生皆撫而用之授以總兵官顧桀驁不能聽節制白晝殺人市中懸其腸於貴官之門以示威莫敢問者七門之外號令不行十五日丁亥王方閔射百官朝服行禮俄報

大清兵已逼觀生以爲妄言惑眾已自東門入始召兵登城戰倉卒不能集城遂陷王急易服踰垣匿王應華家俄爲追

騎所獲安置東察院饋之食不食曰我若飲汝一勺水何以
見先人於地下遂投繯死周益遼等二十四王俱遇害觀生
及太僕寺卿霍子衡國子監祭酒梁朝鍾行人梁萬爵死之
吾騶等皆降

男承禮編輯

仁和魏錫曾參校
會稽梁繼元覆校

小腆紀傳卷第三終

小腆紀傳卷第四

前翰林院檢討加詹事府贊善銜六合徐鼎

紀第四

永愿上

永愿帝神宗之孫桂端王常瀛少子也諱由榔崇禎九年封永明王十六年張獻忠陷衡州王由永州入粵西爲賊所執繫道州征蠻將軍楊國威遣部將焦璉攀城破械出之王病不能行璉負王趨渡河獲免南都之亡也廣東在籍尙書陳子壯將奉端王監國會隆武帝立議遂寢端王薨於蒼梧長子安仁王由棖襲封居肇慶病篤召巡撫瞿式耜入屬以王自言爲再生仰藍弟亦羅漢先生好輔之安仁王薨隆武帝

以王襲封詔中有天下王之天下語又嘗語羣臣曰永明王
神宗嫡孫統系最正朕無子後當屬諸隆武二年丙戌八月
駕陷汀州變聞總督丁魁楚暨武耜與巡按御史王化澄鄭
封知府朱治澗錦衣衛僉事馬吉翔太監龐天壽等議監國
而舊臣呂大器李永茂晏日曙湯來賀董天閔周鼎瀚方以
智林佳鼎程源等先後至僉謂王統系正賢而當立乃以冬
十月十四日丙戌監國肇慶祭告天地宗廟以府署爲行在
頒詔楚滇黔蜀以魁楚爲東閣大學士兼戎政尙書大器爲
東閣大學士兼兵部尙書式耜以大學士兼吏部右侍郎永
茂請終制化澄以下進爵有差封狼兵帥李明忠爲武靖伯
壬辰湖廣督師何騰蛟巡撫堵胤錫奉表勸進以馬吉翔郭

承昊嚴雲從吳繼嗣爲錦衣衛使以前太監王坤爲司禮監
秉筆太監進定蠻伯劉承胤爵爲侯鎮寶慶是月我

大清兵取興化知府劉永祚死之取漳州漳南道傅雲龍知
府金麗澤知縣涂世名死之十一月癸卯朔日有食之間贛
州報丁魁楚王坤奉王奔梧州瞿式耜止之不聽丁未前大
學士蘇觀生奉唐王聿錡稱帝於廣州事聞魁楚謂不卽位
無以厭人心而號召天下奉王以甲寅日還肇慶以十八日
庚申卽皇帝位仍稱隆武三年以明年爲永厯元年大赦天
下是日和風旭日有五色大鳥從南來集殿上士民歡呼謂
中興可卜追尊皇考桂端王曰端皇帝尊繼母太妃王氏爲
慈甯皇太后生母馬氏爲皇太妃冊妃王氏爲皇后通隆武

尊號曰思文皇帝后曰思文皇后封太后弟王國璽武靖伯太妃姪馬九功鎮遠伯后父王略長洲伯進督師何騰蛟爲武英殿大學士加太子太保以瞿式耜爲文淵閣大學士以朱容藩掌宗人府事命兵科給事中彭耀主事陳嘉謨宣諭廣州爲蘇觀生所殺乃以兵部右侍郎林佳鼎督師三水以拒廣州兵加陳子壯中樞殿大學士兼兵部尙書節制兩廣江西福建湖廣軍務時子壯居廣州之九江邨陰致書瞿式耜請兵東向故有是命癸亥前大學士傅冠被執至汀州不屈死之庚午李明忠敗廣州兵於三水是月丁巳鄭芝龍降於我

大清丙寅鄭彩奉監國魯王次中左所尋改次長垣詳魯紀

傳不具錄十二月癸酉朔招討大將軍忠孝伯朱成功起兵海上甲戌林佳鼎與廣州兵戰於三山口敗績內批以王化澄爲兵部右侍郎代佳鼎督師尋代呂大器爲尙書起復李永茂爲東閣大學士知經筵永茂與太監王坤不合辭官去坤復疏薦海內人望數十人給事中劉肅疏論之御史童琳亦劾都御史周光夏私亂臺規上怒奪肅官下琳廷杖瞿式耜力持之得寢丁亥降將李成棟以我大清兵入廣州聿鏐及蘇觀生皆自殺報至瞿式耜請守峽口不從丁酉上奔梧州以朱治澗爲兩廣總督守肇慶是月江陰黃毓祺徐趨起兵襲縣城不克趨死之我

大清肅親王豪格誅獻賊於鳳凰山其餘黨孫可旺等陷佛

圖關平蜀侯曾英死之我兵取重慶巡撫馬乾死之我
大清順治四年丁亥春正月癸卯朔上在梧州稱永歷元年
戊午李成棟以我

大清兵取肇慶朱治憫棄城走上奔平樂瞿式耜從丁魁楚
王化澄李永茂晏日曙皆棄上去會前都御史張家玉舉人
韓如璜起兵復東莞與兵科給事中陳邦彥合兵攻廣州我
總督佟養甲呼成棟還救式耜乃奉 upper 由平樂如桂林加式
耜太子太保遣使趣何騰蛟入衛乙丑我

大清兵取高州雷州廉州辛未取梧州巡撫曹燧降副使陳
象明蒼梧縣丞巫如衡死之取平樂布政使耿獻忠降取潯
州武靖伯李明忠降朱容藩以罪削職尋復之是月丁魁楚

爲李成棟所殺孫守法退屯石子城孫可旺陷遵義二月召
前大學士王錫袞前禮部尙書文安之入閣周堪廣爲戶部
尙書郭都賢爲兵部尙書道阻皆不至以翰林學士方以智
爲東閣大學士劉遠生爲刑部尙書壬午月掩歲星於東井
陳邦彥復順德定蠻侯劉承胤以兵入衛駐全州丙戌上幸
全州式耜疏止之不聽進式耜文淵閣大學士兼吏兵二部
尙書留守桂林以焦璉兵隸之進承胤爲安國公命思恩侯
陳邦傳守昭平以禮部右侍郎吳炳兼東閣大學士入閣辦
事丙申我

大清兵取長沙何騰蛟檄諸鎮赴援不至走衡州我兵遂取
湘陰守將王進才大掠而遁是月孫守法退守石鼇谷孫可

旺陷貴陽布政使張耀死之陷定番僉事曾益死之陷永甯
知州曾異撰死之三月甲辰順德復陷陳邦彥退據下江門
戊申瀏陽伯董英降於我

大清乙卯我

大清兵攻桂林留守瞿式耜率焦璉禦卻之劉承胤遣兵赴
援至則我師已退因留助守戊午張家玉再復東莞己未兵
部尙書詹兆恆自懷玉山出攻開化敗績死之是月孫守法
復甯州拔興安之蕎麥山石屏副將龍在田苦沙寇之亂乃
乞師於孫可旺可旺始入雲南旣敗沙賊於革泥關遂屠曲
靖巡按羅國瓛僉都御史朱壽琳知府焦潤生推官夏衍虞
死之陷南甯知縣陳六奇死之陷廣通在籍州同知張朝綱聞

門死之陷姚州知州何思舉人席上珍金世鼎死之陷武定
同知楊于陸死之陷師宗署知州徐道興死之進逼楚雄舉
人杜天楨死之巡撫楊畏知拒之於祿豐可旺願受約大理
及迤西八郡得免於禍可旺移檄永昌迎沐天波歸省垣索
道府印署金騰道王運開署知府劉廷標不屈死別部李定
國掠河西在籍巡撫耿廷錄死之陷晉甯知州冷陽春呈貢
知縣夏祖訓舉人段伯美諸生余繼善耿希哲等死之江川
知縣周柔強拒戰於撫仙湖敗績死之迤東諸郡屠戮甚慘
夏四月江西大旱壬申朔進張家玉兵部尙書兼副都御史
提督嶺東軍務聯絡漳湖癸酉我

大清兵取衡山乙亥我

大清兵取瓊州封錦衣衛指揮馬吉翔郭承昊嚴雲從等爲
伯御史毛壽登爭之吉翔怒激劉承胤劾上下壽登及劉湘
客吳德操萬六吉廷杖承胤又佯爲申救得免皆奪職遂劫
上如武岡政事皆決於承胤矣太常寺卿潘應斗棄官去是
月陝西興安陷■伯孫守法死之辛巳降將孔有德耿仲
明尙可喜以我

大清兵分道取湖廣癸未取衡州殺黃朝宣甲申白虹貫日
我兵取永州王允成走辰州馬進忠走沅州盧鼎郝永忠走
道州時湖南州縣瓦解督師何騰蛟還駐白牙市兵部右侍
郎章曠還駐東安太常寺少卿程源以罪削職丙戌降將吳
勝兆謀叛我

大清以松江歸監國魯王事覺爲洪承疇所誅戶部侍郎沈廷揚兵部侍郎左都御史陳子龍死之詳魯紀傳降將王光泰亦於是月以襄陽叛我

大清來歸進謁鄖陽事聞封鎮武伯朱成功復海澄五月福建江西大水辛丑朔新安陷庚戌揚州地震甲寅改武岡州爲奉天府以周鼎瀚爲東閣大學士同劉承胤入直以貴州總督李若星爲吏部尙書甲子常德陷承胤援桂林兵與焦璉兵主客不和擊傷璉大掠城中而去瞿式耜檄誅首惡二十餘人劾承胤馭兵無狀璉兵亦出城赴黃沙鎮我

大清聞亂復攻桂林璉還桂林與

大清兵連戰城下卻之戊辰和平陷知縣李信死之論保桂

林功晉瞿式耜少師兼太子太師封臨桂伯焦璉新興伯擢
巡按廣西御史魯可藻爲巡撫副將周金湯復永州是月劉
承胤以長沙失守奏解何騰蛟兵柄上不許遣中使召騰蛟
入朝計事以雲南總兵趙印選胡一青兵隸之六月庚午朔
騰蛟朝行在陛辭賜銀幣命廷臣餞之郊承胤伏甲襲之不
克堵胤錫疏劾承胤而總兵張先壁自江西擁潰兵入楚劾
承胤專權請以兵入朝高必正李赤心亦請就食湖南承胤
懼乃請命騰蛟駐衡州督師加胤錫東閣大學士賜尙方劍
駐長沙時衡州長沙俱失二臣但擁虛號而已湖南流寇曹
志建王朝俊以其眾降賜爵侯伯有差秋七月甲辰陳子壯
會陳邦彥共攻廣州敗績子壯走還九江邨邦彥奔三水兵

部右侍郎湖南巡撫章曠卒於軍前福建提學道毛協恭被執於建甯不屈死之是月朱容藩僭監國號於四川初容藩由辰州入施州衛假稱楚世子天下兵馬副元帥又以李占春于大海兵敗我

大清兵於萬縣之湖灘遂稱監國時干戈阻道文告不通川中諸將不知其僞也八月己巳朔以戶部侍郎嚴起恆爲東閣大學士時清遠指揮白常燦以城迎邦彥御史麥而炫起兵復高明迎子壯入守之李成棟往來追擊不能西顧於是焦璉以其間復陽朔平樂陳邦傳復梧州縣丞徐定國復懷集全粵少定方擇日迎駕返桂林而我

大清兵克寶慶辛卯進逼奉天劉承胤舉城降大學士吳炳

兵部尙書傅作霖死之商邱伯侯性部將謝復榮偕馬吉翔奉上及三宮走靖州復榮戰死性與太監龐天壽將兵追扈於古泥關上乃由通道縣入蠻境達柳州晉性祥符侯天壽掌司禮監印我

大清兵取沅州偏沅巡撫傅上瑞迎降前貴陽巡撫米壽圖死之克黎平總兵蕭應死之時高明亦陷督師東閣大學士陳子壯御史麥而炫主事朱實蓮皆死之是月朱成功會師泉州之桃花山在籍御史沈佺期等起兵應之進攻泉州不克九月己亥朔上次靖州我

大清兵克清遠兵科給事中陳邦彥指揮白常燦生員朱學熙死之是月川北總督李乾德以袁韜兵復重慶前南昌知

縣劉曙被執至南京不屈死之冬十月戊辰朔上如柳州瞿式耜連疏請還蹕桂林上諭曰西陲朕根本地先生竭力守此異日國家再造先生功實多辛未太白經天丁丑土司覃鳴珂與守道龍文明閔於柳州文明走鳴珂大掠矢及上舟上倉卒奔象州兵部尙書張家玉與李成棟戰於增城敗績死之降將耿仲明以我

大清兵取永州遂取全州守將王允成唐文曜守道馬鳴鸞皆降克辰州榮王由楨死之克黔陽閣部李若符翰林院待詔邱式耜死之是月監國魯王頒監國三年戊子大統歷於海上朱成功未聞粵中卽位詔又不欲奉魯監國乃頒隆武四年戊子大統歷於海上於是海上有二朔矣十一月戊戌

朔上在象州我

大清兵進逼全州何騰蛟督諸軍禦卻之逼梧州上走南甯道阻不果乃命王化澄吳貞毓龐天壽護三宮前往而與馬吉翔遡十八灘返桂林是月容藩使李占春襲袁韜營不克王祥復以其眾與韜戰亦不克時容藩欲立威總督李乾德亦挾詐翦除異己川事益壞十二月丁卯朔日有食之己巳上至桂林自幸柳幸象票擬皆錦衣衛馬吉翔主之式耜勸上攬大權明賞罰親正人上嘉納之初湖南失陷郝永忠盧鼎趙印選之眾還入桂林人情惶駭式耜與督師何騰蛟大學士嚴起恆御史劉湘客議分地給諸將俾各自爲守全州之役騰蛟集諸將誓神前分道出戰大敗我師連營亘三百

里軍聲頗振而諸將主客不和比騰蛟出屯永福而焦璉走平樂郝永忠壁興安式耜騰蛟亦無如何也是月鄞縣華夏屠獻宸王家勤等謀以甯波歸監國魯王不克所謂五君子翻城之獄也詳魯紀傳我

大清順治五年戊子春正月丁酉朔上在桂林稱永曆二年以百官星散免朝賀遣大理寺評事朱宿垣諭廣西左右兩江及雲南土司勤王論全州戰功晉何騰蛟定興侯太師上柱國兼兵部尙書趙印選新甯伯胡一青興甯伯焦璉新興侯周金湯熊兆佐馬養麟等掛印有差論川省收復州縣功晉樊一蘅太子太傅戶兵二部尙書擢巡按御史錢邦芑右僉都御史巡撫四川封楊展華陽伯王祥綦江伯諸將晉爵

有差又川將趙榮貴以保甯來歸封定隨侯監軍僉事詹天
顏奏復龍安茂州擢天顏巡撫順慶潼縣以總兵皮勛守平
溪是月癸亥降將金聲桓偕其黨王得仁以南昌叛我

大清來歸二月鳳陽地震我

大清兵攻平溪總兵吳尙慮等死之克永甯寨貴溪王常淝
總兵項登韋死之克黎平寨奉國將軍暉奎死之丁亥郝永
忠敗績於興安自靈川入桂林大掠上走南甯遂劫瞿式耜
出城日中滇營兵入城大掠詔何騰蛟入援我

大清兵遂乘之取全州中書舍人周震守備孟泰皆死之克
興安之巖關總兵某某皆死之辛巳鎮江地震辛卯白虹貫
日是月王得仁克九江尋引還會金聲桓攻贛州三月丙申

胡瞿式耜何騰蛟入於桂林焦璉周金湯熊兆佐胡一青先後統兵至軍勢復振乙巳上如南甯命嚴起恆王化澄入閣起恆兼吏部尙書龐天壽掌司禮監加南甯守道趙臺巡撫銜其餘隨駕者馬吉翔暨兵部尙書蕭琦科臣許兆進吳其濡尹三聘洪玉鼎洪士彭數人而已時君臣資斧乏絕嚴起恆懸示通衢廣爲開選二十四土州檳榔鹽布諸賈及土樂戶皆註仕籍假府學明倫堂爲公座蒞任地旗幟軒蓋偃僂馨折日以百數贊禮生爲之驕貴安南國遣使入貢丁巳我大清聞郝永忠之亂以

大兵直抵桂林北門何騰蛟督焦璉周金湯熊兆佐胡一青分門出戰大敗之乃列營榕江進荊江伯張先壁爲侯我

大清以江西亂引兵北還式耜乃檄諸鎮復全州巡撫魯可藻復梧州疏達行在候天子三宮起居上聞式耜無恙大喜璽書褒美賜紗段銀兩周鼎瀚免以禮部侍郎朱天麟爲尙書尋進東閣大學士陳邦傳自請世守廣西不許進呂大器少傅代王應熊督師賜尙方劍便宜行事是月前兵部尙書周損知府傅夢鼎典史傅謙之等奉石城王統錡起兵六安獨人米喇印丁國棟奉延長王識鐸起兵蘭州皆不克死之夏月明閏三月丙寅朔元子慈烜生冊爲太子大赦羣貳耜進八箴乙亥降將李成棟以廣東叛我

大清來歸遣洪天擢潘曾緯李綺齋奏赴南甯迎駕時陳邦傳與趙臺相讐殺行在人心皇皇乍聞成棟來歸驚疑百端

天擢等力陳成棟忠誠且述江西金聲桓事甚悉人心始安
召前四川巡撫毛芝瑞爲吏部左侍郎未至卒是月前吏部
員外郎華允誠被執至南京不屈死之閏四月明四月乙未
朔遣吏部侍郎吳貞毓祥符侯侯性勞李成棟軍封成棟惠
國公佟養甲襄平伯杜永和江甯伯羅成耀寶豐伯董方策
宣平伯郝尙久新泰伯張月博興伯閆可義武陟伯加齊奏
速駕之沈原渭爲副都御史於是羣臣伏處者爭出又有考
貢之旨能握管書字者投呈就試章服錯亂漫無等威五月
乙丑朔日有食之何騰蛟復全州降將陳友龍復以武岡州
來歸我

大清兵逼南昌金聲桓王得仁自贛州引還旣入城我兵築

長圍守之遂大困是月朱成功復同安六月甲午朔有流星入於箕尾封金聲桓豫國公王得仁建武侯初聲桓歸明半年尚稱隆武四年有舊臣至述閩陷廣立之詳始改稱永歷遣人間道齋佛經置密疏其中赴南甯輸款表自署豫國公詔改封昌國聲桓頗鞅鞅致書朝臣請還故封久之始如所請甲辰上幸潯州陳邦傳以世守廣西要請乃封邦傳慶國公以再復湖南州縣晉馬進忠王進才李赤心高必正爵爲公秋七月甲子朔上次梧州謁興陵成棟使部將羅成耀將兵迎駕八月癸巳朔上還肇慶以成棟爲翊明大將軍其養子元胤爲錦衣衛指揮使曹燧爲兵部尚書耿獻忠爲工部尚書袁彭年爲都察院左都御史召瞿式耜入閣辭不至甲

辰命成棟攻贛州以救南昌盜殺兵部右侍郎劉季鏞前大學士路振飛航海朝於行在是月督師呂大器討朱容藩誅之我

大清兵克同安朱成功部將邱縉林壯猷金作裕知縣葉翼雲教諭陳鼎皆死之成功遣前中書舍人江干燦黃志高奉表行在九月癸亥有火星自東隕有聲壬午何騰蛟復永州遂復衡州是月前涪川知縣王嫻復廬州再攻霍山不克冬十月監軍御史余鯤起職方主事李甲春復寶慶馬進忠復常德堵胤錫招李赤心於夔州令進忠以常德讓之進忠怒大掠走武岡王進才亦棄寶慶走既赤心至常德不入引兵走長沙諸營皆潰湖南新復州縣爲之一空楚事始不可爲

矣丁巳李成棟之師潰於贛州城下封朱成功爲威遠侯十一月佟養甲伏誅以李元胤署吏部尙書堵胤錫率李赤心等敗降將線國安於湘潭遂復益陽湘潭湘鄉衡山等縣進圍長沙弗克是時南昌圍急成棟駐信豐勢不復振總督義師兵部尙書揭重熙侍郎傅鼎銓前督師余應桂前工部侍郎劉士楨九江生員金志達僧了悟建昌人孔徹元徹哲兄弟蔡觀光各起兵援南昌先後敗死陝西自孫守法死後義旅散亡會降將姜瓖以大同叛我

大清來歸在籍鄉官萬練劉遷王永強皆舉兵應瓖練踞偏關復甯武岢嵐保德遷略雁門關及代州繁峙五臺等縣永強據榆林窺西安於是前甯夏巡撫李虞夔起兵平陸克潼

關及蒲解二州十二月辛卯朔我

大清兵援長沙李赤心大掠湘潭而遁召弋陽王某於建陽
山中不至我

大清順治六年己丑春正月庚申朔上在肇慶稱永厯三年
是日大雷雨風雹免朝賀丁卯李成棟殺宣忠伯王承恩尋
殺大學士朱由棖壬申朱天麟罷召黃士俊何吾騶入閣戊
寅我

大清兵克南昌金聲桓王得仁伏誅前大學士姜曰廣死之
江西全省復陷庚辰陷湘潭督師定興侯何騰蛟死之丁亥
定隨侯趙榮貴與我

大清兵戰於龍安栢峪口敗績死之是月我兵之在桐院者

克舒城潛山諸寨侯應龍等死之二月庚寅朔張先壁攻辰
州不克甲寅長沙復陷乙卯成棟之兵潰於信豐溺死初江
廣反正楚軍奏捷中外謂興復可期一朝崩潰舉朝大駭至
有冒雨逃者贈騰蛟中湘王諡忠烈成棟甯夏王聲桓南昌
王設壇致祭三月丙寅以杜永和爲兩廣總督守廣州羅成
耀兼巡撫銜守南雄賜瞿式耜彤弓鐵鉞督視江楚各省軍
馬李赤心軍潰於茶陵大掠衡永郴桂走廣西堵胤錫以胡
一青趙卬選兵守衡州是月揭重熙招江西故將張自盛洪
國玉曹大鎬李安民四營兵駐甯都石城間傅鼎銓亦合浙
東徐孝伯軍駐徐博圖復江西朱成功屯兵分水關圖復惠
潮江陰黃毓祺被執至南京不屈死之夏四月太白入月堵

盾錫敗績於衡州之草橋走龍虎關守將曹志建襲之盾錫走梧州是月孫可望遣雲南巡撫楊畏知兵部郎中龔彝奉表乞封王爵乃封可望景國公賜名朝宗劉文秀李定國爲列侯加畏知兵部尙書彝兵部侍郎偕大理卿趙昱衍命入雲南五月以兵部侍郎張同儔總督軍務盜殺兵部侍郎程炯於界口趙卽選胡一青王永祚率所部至桂林隸瞿式耜晉卽選開國公一青興甯侯永祚甯遠伯分守桂林全州是爲滇營旣以部眾多劫掠焦璉部將趙興惡而攻之殺滇兵四五人幾大関璉不得已斬興以謝滇營事得釋六月己丑朔袁彭年免甲辰堵盾錫自梧州朝於行在加文淵閣大學士封光化伯命督師梧州節制忠貞忠武忠開諸營秋七月

盾錫承制封孫可望爲平遼王可望不受瞿式耜疏劾已革
巡撫魯可藻不守制以南雄固守遣內侍齎敕獎武陟伯閔
可義誅副將楊大甫焦璉趙印選遣兵圍永州我

大清兵復取永甯州胡一青還守榕江瞿式耜檄一青進屯
全州廷臣集議慈甯宮發餉萬兩給式耜晉封朱成功爲廣
平公八月焦璉部將劉起蛟敗績於興安是月李乾德殺華
陽伯楊展九月陳邦傳部將曾海虎劫監軍御史毛壽登於
途式耜檄誅之是月陝西平陸山寨陷前右僉都御史甯夏巡
撫李虞夔及其子宏皆死之冬十月我

大清兵攻道州曹志建禦卻之己丑馬進忠復武岡尋復寶
慶靖州庾闕陷羅成耀不敢進次於韶州何吾騶王化澄罷

始命閣臣擬旨於文華殿封皮熊爲匡國公鎮守貴州王祥爲忠國公鎮守雲南以備孫可望也是月監國魯王入於舟山十一月丙辰朔我

大清兵克延平之將軍寨德化王慈熿死之降將孔有德自將救永州分兵敗巡撫鄭愛於燕子窩愛與副將陳勝彭昌高勝談玉等皆戰死辛巳督師大學士堵胤錫卒於潯州十二月丙申王永祚敗績於永州張同敞檄楊國棟駐全州戊申以史館乏員上親試士取劉蒞錢秉鐙楊在李來吳龍楨姚子壯涂宏猷楊致和八人授庶吉士封李建捷爲安肅伯

小腆紀傳卷第四終

男承禮編輯

仁和魏錫曾參校
會稽梁繼元覆校